

pro injuncti sibi muneris ratione, zelo, ac solertia, adhibitis etiam in consultationem et opus doctis, ac diligentibus viris, omnia pro votis sedulo, accurateque perfecerunt. Absolutum itaque juxta mentem nostram laudatum Indicem, et ab iisdem Cardinalibus revisum, atque recognitum typis Camerae nostrae apostolicae edi volumus, ipsumque praesentibus Litteris nostris tamquam expresse insertum habentes, auctoritate Apostolica tenore praesentium approbamus, et confirmamus, atque ab omnibus et singulis personis, ubicumque locorum existentibus, inviolabiliter, et inconcusse observari praecipimus, et mandamus sub poenis tam in Regulis Indicis, quam in Litteris, et Constitutionibus Apostolicis alias statutis, et expressis, quas tenore earumdem praesentium confirmamus, et renovamus. Non obstantibus Apostolicis generalibus, vel specialibus Litteris, Constitutionibus, ac quibusvis statutis, decretis, usibus, stylis, et consuetudinibus etiam immemorabilibus, caeterisque in contrarium facientibus quibuscumque. Volumus autem ut earumdem praesentium Literarum transumptis, seu exemplis etiam impressis, manu alicujus notarii publici subscriptis, et sigillo Praelati alicujus in dignitate ecclesiastica constituti obsignatis eadem prorsus fides habeatur, quae ipsis praesentibus haberetur, si forent exhibitae, vel ostensae.

Datum Romae, apud sanctam Mariam Majorem, sub annulo Piscatoris die XXIII. Decemb. MDCCLVII. Pontific. Nostri anno XVIII.

CAJETANUS AMATUS.

## FR. HIERONYMUS PIUS SACCHERI

ORDINIS PRÆDicatorum SACRÆ CONGREGATIONIS INDICIS. A SECRETIS

CATHOLICO LECTORI.

Exhausta librorum prohibitorum Indicis novissima editione sub s. m. Gregorio Papa XVI. impressa, curas omnes jussu SS. D. N. Pii IX. P. M. ad opus recudendum intendimus; eo pariter freti ut hac in re plurium precibus instanter emissis (de quo flexis genibus Deo benedicimus, quia quo magis increduli in religionis jura, morumque integritatem debacchantur, eo magis veritatis amor in fidelium mentibus excitatur), responderemus. Modo igitur hæc in lucem prodit editio, juxta Patrum Tridentinae Synodi mentem concinnata, ac præ aliis antecedentibus locuples, cum ea omnium librorum usque in hanc diem vetitorum integram seriem exhibeat, quo fit ut catholicus vir veritatis semitas inoffenso pede percurrere valeat.

De Indicis vero methodo, qua brevitati nec non claritati consulendum erat, nil de penu nostro referemus (præter ea quæ hac in editione adnotanda et adjungenda censuimus), satisque sit lectoribus novisse, elapso sæculo Fr. Thomam Augustinum Richinium prædecessorem nostrum, summo pollentem ingenio, hanc excoluisse partem, opusque virorum cordatorum plausu adamussim perfecisse, ut ex sequentibus ejusdem verbis compertum erit.

« Imprimis Indici universo cum Regulas ipsius Indicis sacrosanctæ Synodi Tridentinae jussu editas, tum easdem in Regulas Observationes, quæ Clementis VIII., et Alexandri VII. auctoritate confectæ sunt, præmisi-mus, una cum ejusdem Clementis VIII. Instructione. Quibus quidem rebus omnibus cum majorem et lucem et vim afferat sapientissimi Pontificis Benedicti XIV. Constitutio incipiens: *Sollicita ac provida*: eam idcirco adjungendam putavimus. Subjecimus deinde decreta quædam generalia, quo et brevitati Indicis consuleremus et dubitationem omnem tolleremus, si qua de certis quibusdam libris suboriri posset, qui in Indice nominatim descripti non essent.

« Auctores autem ipsos, quorum nomina ac cognomina, magna adhibita diligentia germanæ lectioni restituimus, in alphabeticum ordinem rede-gimus, majoremque in iis afferendis rationem habuimus cognomi-num, quam nominum, quod hæc illis minus nota esse videantur. Cogno-minum tamen loco habuimus quoque simulata cognomina, quibus pseu-donymi delitescent, tum aliquando patriam, aut etiam sanctos ipsos, quos sibi nonnulli tamquam cognomina assumunt.

« Theses atque disputationes non discipulorum, sed magistrorum aut præsidentium nomine, qui plerumque earum auctores esse solent,



disposuimus, nisi forte quis, vel suum unice, non magistri nomen attulerit, vel ipse quidem earundem thesium verissimum auctor habitus sit.

« Libri a duobus auctoribus conscripti ejus auctoris cognomine referantur, qui primus ordine repetitur. Qui vero libri a pluribus compositi sunt, jam non auctorum cognominibus, sed ipsis titulis designantur.

« Eadem ratione anonymos libros, alphabeti ordine retento recensuimus; quos inter si quis libros aliquos adnumeratos deprehendat qui certos auctores habent, nec unquam anonymi editi sunt, id et in hoc præcedentibus Indicibus, et in nostro non sine causa factum esse intelligat.

« Titulos vero librorum, quos pariter emendandos suscepimus, eadem orthographia descriptos attulimus, quam auctores ipsi adhibuerunt. Et aliquibus quidem libris locum et tempus editionis addidimus tum lectorum commodo, ne scilicet illos cum aliis ejusdem tituli atque argumenti confunderent, tum ad commonstrandum editiones illas, non reliquas, quæ diversæ sunt, aut emendatæ, esse proscriptas. Cæterorum vero librorum, si locum, ubi impressi sunt, omisimus, id propterea faciendum existimavimus, ut intelligeret quisque omnes eorum librorum editiones, quocumque tandem loco factæ sint, prohibitas esse; id enim cautum decretis S. Congregationis. Quam ob rem perraro etiam unius ejusdemque libri diversas quæ aliquando fieri solent, indicavimus versiones. Cum ex instructione Clementis VIII. tit. de prohib. librorum §. 6. appareat perniciosos ac malos libros, qui certa aliqua lingua editi, ac deinde prohibiti sunt, prohibitos censi debere, in quodcumque idioma postea transferantur.

« Diem, mensem et annum prohibitionis singulis fere libris, qui post annum 1596. proscripti sunt, adjunximus. Descriptos vero ante prædictum annum in Indice Pii IV., quem Tridentinum vocant, et in Indice Clementis VIII., qui Tridentini appendix vocari solet, hisce notis distinguimus: *Ind. Trid., App. Ind. Trid.*

« Quibus autem libris, eo quod utilitatem aliquam præferre videantur, additum est *Donec corrigantur*, seu *Donec expurgentur*, eam correctionem a nemine privato judicio atque auctoritate fieri posse, sed rem totam ad sacram Indicis Congregationem esse deferendam monemus.

« Jam vero reticendum non putamus, quod non ii dumtaxat libri excommunicationis reservatæ pœna sunt proscripti, qui ab hæreticis compositi de Religione catholica ex professo agunt, hæresesque docent, quod Litteris Apostolicis die Cœnæ Domini legi solitis, et Constitutione Alexandri VII., quæ incipit: *Speculatores*, statuitur; sed quod ii etiam fere omnes libri hujusmodi pœna proscribuntur, qui post prædictam Alexandri VII. Constitutionem, editam die 5 Martii anni 1664, Brevibus aut Bullis pontificiis prohibiti indicantur. ut ex ipsis Brevibus intelligi potest, ad quæ lectores remittimus. » Hucusque laudatus Richinius.

At his omnibus dictæ Indicis editioni anni 1758 præmissis, monemus addita in posterum fuisse sequentia, quæ pariter nos retulimus, primo: mandatum s. m. Leonis XII. quod simul cum decreto prohibitionis quorundam librorum sub die 26 Martii 1825 editum fuit. Secundo: Monitum S. Congregationis additum decreto 4. Martii 1828. Tertio tandem: Monitum ejusdem S. Congregationis 7. Januarii 1836.

Nunc vero monendum catholicum lectorem ducimus de iis quæ hac in editione adjungenda ac innovanda censuimus. Primo ad calcem omnium præmissorum inserta fuit additio novissima redacta juxta Constitutionem SSmi D. N. Pii Papæ IX., quæ incipit: *Apostolicæ Sedis* etc.

Deinde addita fuit declaratio respiciens opera, quæ de immaculata conceptione B. Virginis Mariæ agunt, et quæ in librorum prohibitorum Indicem jam relata, relicta fuere.

Tandem opera sub cognomine et nomine auctoris ubi adhuc factum non fuerat, pariterque ea quæ simile auctoris cognomen vel similem operis titulum exhibent, ordine decretorum chronologico, referre putavimus. Quod si aliquid irrepserit in altera editione emendare satagemus.

Reliqua levioris momenti, quæ in hac editione præstanda curavimus, animadvertenda lectori relinquimus.